

NOBENAN
I NIÑO JESUS



TINIGE
PALE ROMAN
MARIA DE BERA
giya Guahan
Misioneron Kapuchino

J R N

Imprimatur

FR. A. W. BAUMGARTNER

O. F. M. CAP.

Vic. Ap.

Guamensis

16. Februarii 1948.



NOBENAN I NIÑO JESUS.

Tatanmame, na gaige hao...
Si Yuus unginegue, Maria...
Manhoñgge yo as Yuus Tata...
Asaena, baba i pachotto. Ya i pachotto un-
tinina. Yuus, maila ya unayuda yo. Asaena,
guse magi ya ungogue yo.
Umatuna i Tata....



MAFONA NA TINAYUYUT.

Senmames Jesus, i Minakahaya i tao-
tao! Hagas-ha unmagufe sumagaye i
taotao siha, untatañga na infanhamyo
yan i mandikiki na famaguon, sa ileg-
mo: "Pelo i famaguon na ufanmamaila
giya guaho, sa iyónñiha yan i mañiloñg
yan i famaguon i rañon i lañget". Asae-
na, nafanmamaila ham gi ménamo; in-
dimuye yan intatayuyut hao na unasio

i isao yan i linachenmame, ya unnae ham grasia yan megai na minaasè ni i innanañgga ginem i dikiki yan todo-ha hanasiña na kanaimo.

Guinè na Nobena innakekematuna i guaeyayon na Imahenmo; ya ingagao hao na unina yan unogte ham grasian lañget ni i unahúlat ham humasuye i manmames na Finapos i yiniusan na Pinatgonmo. Ya enao siha na hinaso, mandadaña yan i manmanhulat na tinayuyut i sengasgas na Nanamo as Santa Maria, uhanatuñgo yan uhanagoflie ham nu hago guine gi tanò ni i sagan lago, ya an magtos i haanenmame uhanahago ham nu i taihinekog na minagof i lañget, sa enao-ha mina unfâtinas yan unnafañgahaya ham. Taeguenao mohon.

FINENANA NA HAANE.

————— « » —————

Mafañagon i Patgon as Jesus.

Kalan unlilie-ha i Patgon as Jesus
guihe gi liyan Belen, manaono pañales,
manaason gi pesebre gi hilo i ñgasan,
gi entalo i dos gagà ni i humahahaye
yan hanamamaipe gue. I na pineble,
dilikiki yan tinai-ninasiñan i Todo-ha
hahulat na Lahan Yuus!

Si Santa Maria yan i asaguaña as
San Jose dumidimo yan haadodora i Sae-
nan i lañget yan i tanò. I añghet siha
maagululume yan halalailai i matunaña.
Ayo na pueñge anae mafañago i Lahan
Yuus na Mamataotao, mumalagña ke i
nauau yan bula somnag na taloane. Ya
námanman na pution sumulo gi sanka-
tan hatanchuchue i taotao siha ni i ma-
ngangagige gi tanò mano nai gaige i
Patgon as Jesus.

Manhoñgge yo nu i Patgon ni i hu-
lilie: guiya yo munahuyoñg gine i taya;
ya guiya i Todo-ha hanasiña na Saenata,

i taitutuhon yan i taichii, taihinekog na Yuosso ni i yumaña mamataotao finâ-tinas Yuus Espiritu Santo, finañago nu i Bithen as Maria; guiya Minakahaya yo. I linieeho guenao patgon-ha na hine-hegue as Nanaña yan iniiga as San Jose i mafa-tataña, yan inadodora nu i mamobile yan man manhoñgge na pastot giya Belen. Lao enao na Patgon ulá-modong, unaumitde sagaña giya Nasaret, ufachocco gi chechò katpintero, i masahalom i mataña nai uninachocco gue ni agonña; ya utaeguenao haaniña trenta años. Ya añg manmagpo yenao, ugefmasâpet, uuma i makat na kiluus i isaota siha; ya ulachai numaeñaihon i haaniña sa umapuno gi hayon i kiluus. I taotao siha ni i manmanhoñgge nu guiya, yagin uhadalalag i finanagueña yan i tinagðña siha, ufanhalom gi rainon i lañget. Lao i mañ águaguat ni i ti manmanhoñgge ya haságuaguate, utaihinekog manmayo-guanñiha giya sasalaguan.

Saenaho yan Yuosso!

O TINIÑGO ni i humuhuyoñg gine i pachot i Geftagkilo, ya untaka i tutuhon yan i chín i tanò, ya unnafehman yan unnamames finamaulegmo nu todo i guinaha. Maila ya unfanague ham nu i chalan i tinemtom.

—————«»————

TRES NA HINAHAN I ANTE

Yuus na Patgon! Hago umalog na i “mangagao umanae”. Nae yo nu i hugagao hao i hutatañga pago gi menan i Imahenmo.

Tatanmame....

Yuus na Patgon! Hago umalog “i manaligao ufañoda”. Nasoda yo ni minauleg ni huegaga, sa hutuñgo na makihiom gi dikiki na kanaimo.

Tatanmame....

Yuus na Patgon ni i numae finiho i taotao siha na “i manyaho umababayé”.

Atan yo guine na manyayaho gi pettan i yoasè na korasonmo. Babaye yo, ya huhalom gi anae hutatañga, ya hugefsaga yo yagin humita yan hago.

Tatanmame....

Fanaitai dididi; ya ungagao i Patgon Yuus ni sasahñge na grasia ni i untatañga guine na Nobena. Taya minaulegña i Nobena, yagin ti manayuyut hao as Yuss.

—————»—————

MANMAMAGPO NA TINAITAI.

Tafan Manayuyut.

Todo-ha unnasiña yan gagaige-ha na Yuus, Saenan i lañget yan i tahò ni i mina malie hao nu i mandikiki. Intata-yuyut hao na unnabaso ham mauleg ni minagahet hineñgge gi Patgon dikiki as Jesus, ya unnadatalalag ham nu todo i hinalommame; ya unnafansiña ham humago i rainon i lañget ni i mapromete gi managpapan hinalom. Ginen as Jesu-

kristo-ha na Saenanmame. Taeguenao mohon.

(Manamaasisie 300 na haanen sinapet.)

Si Jesus tumatanò-ha taeguihe iya hita. Ya hanae gue na maisa guato gi finatai ya hanakahaya gi finatai i señg-soñgña, ya hanataihinekog i Naanña.

Umatuna i Naan i Saenata. — Pago yan i manaihinekog na haane.

TINAYUYUT.

Yuus ni tumagò i mamaisa na Lahimo na unafañgahaya siha i taotao, ya unnamayaho as JESUS. Namagof hao ya unnae ham ni grasian i intina i Santos na Naanña gi tanò, va innafan nina-magof lokue gi lañget nu i malieña. Gi-nen guiya-ha as Jesukristo na Saenanmame. Taeguenao mohon.

MINA DOS NA HAANE.

(*Todo taeguihe-ha i Finenana na Haane;
tulaika-ha yine:)*

«»

I sen Santos na NAAN "JESUS".

Kalan unlilie i linahyan i man añghet yan i mañganite yan i taotao siha na mandidimo yan hatekukune i sensantos na NAAN JESUS, naan ni i minaulegña umiige i pumalon naan siha, sa inayeg gi lañget as Yuus Tata anae tataya tao- tao yan tanò, ya managò na umafânaan JESUS, i maisa na Lahiña ni i Yuus.- Taotao. Anae munhayan malofan ocho na haane na mafañago i yiniusan na Pat- gon giya Belen, machachagñaihon i lasas i sensenña ya mafânaan as JESUS.

I naan JESUS, guiya-ha inañgokoko. Abmam na mahuchom i fanhalumam i lañget sa manisao i taotao siha. Lao i Lahan Yuus, i mina dos na Petsonan i Sinantusan Trinidad mumagof tumunog magi. Hachuda i sen santos na hagàna ya hanafañgahaya hit gi isaota yan i ki-

nautiban i anite as Satanas. I haanen Año Nuebo anae hatutuhon mañuda hagà ginен i mahatot na machachagña i námaagodai na Lahan Santa Maria. Tinagò Yuus na i Finañagon i Bithen umayaho as JESUS, na kumeilegña “Nan-libre”; naan ni i umadimuye nu i mangi-lañget i mangi-tano yan i mangi-sasalaguan. Enao na yiniusan Naan ulachachai munafañgahaya i taotao siha, yagin siha mangef-malago. I Sensantos na Naan JESUS siña unahago yo megai na grasia yan minaase lañget ,yan lokue i sasahñge na gineguen Yuus ni i uchoma yo nu hubasnag gi tentasion; ya enao-ha unamanae yo ti mantufuñgon na minauleg tanò, kololoña ayo siha i uhafamauleg i antiho. Sa guaha ·sinañgan Jesucristo ya uhuhoñg magahet: na mininasiña i Sensantos na Naaña yagin tasañganñañaihon ya tagagao si Yuus Tata nu ayo siha i hatatañga i korasonta.

MINA TRES NA HAANE.

—«»—

Manmato i Pastot siha.

Kalan unlilie-ha i pastot siha giya Belen. Man ninatuñgo nu i añghet Yuus gi halomtanò, ya hafatotoigue i liyan ni sagan gagà. Sumen malag ayo na talopueñge. Man eekahat manhalom guato, mandimo gi fion anae manaason i Patgon as Jesus. Ti sañganon i tagkalom inatanñiha nu i yiniusan na Finañagon Santa Maria ni i man inaatan kulan chumaleg-hahalom. I pachotñiha yan i korasonñiha nai hasañganñañaihon na ayo na Patgon guiya i Matatañga na Mesias pat i Kristo, ni unafañgahaya i famaguon Israel. I pastot siha manmanhoñgge yan manmangoflie as Yuus; ya siha fumanague yo na maulegña na hugoflie si Yuus nu todo i korasonho.

I Saenata as Yuus hagoflie yo naya. Ya guaho hunakekemauleg opeko nu guiya. Iya guaho-ha hahahaso si Yuus sa

yoasè gue na Tataho. I gineflieña nu guaho mina hanaginen i taya yo, ya hatatañga na husaonao gi lañget gi tainekog na ginefsagña. Ti nahon gue nu enao. Sinision nu i manpos na guinaeyaña nu guaho, hanatunog papa i maisa na Lahiña, ya hapôlo na umapuno gi kiluus ya haapasiye yo nu i isaoho siha.

Si Yuus Lahiña lokue sumén hahanon gineflieña nu guaho anae hadiñgo i lañget ya mamataotao ya hatogtog i pineble yan i chinatsaga siha yan i finatai gi kiluus, sa hatatañga na uninañaha i mahetog na korasonho. Hahulat yo; ya hafa hamalagugue apasso nu guiya? Na hugoflie-ha gue. Na hugoflie si Yuus Tata nu i niasiñan yan i hinilat i korasonho na giniflie, megaiña ke iya guaho-ha yan i hanaho.

Ada taeguenao naya i gineflieho nu guiya?

MINA KUATRO NA HAANE.

«»

Inato i Tres Reyes.

Kalan unliliè guine i sen malag na pution ni i malie gi lasas i lañget gi sumankatan, ya i tres Reyes ni i dumadalalag i minalagña manmaudai gi gâniha kameyo, ya manmalag-Judea, anae mandimo gi ménan i Pago Mafañago na Rai i. manhudos, ya maatutue gue oro insienso yan mirra. I pution sumaga gi hilo i liyan anae gagaige i Patgon as Jesus.

Liyan gaga-ha i fanliheñgan i Rai i lañget yan i tanò. I tagahlo yan todo-ha hanasiña na Yuus-Taotao hanasasahñge gumoflie i pineble, ya yumaña umayeg i chatsaga yan i nápinite. I tres Reyes mankinene guato nu i lalalà na hineñgenñiha. Mangêfilo yan mangêfmanhonñgge, manhalom gi fina-palasyon i Lahan Yuus, hadimuye i Patgon ni i fumâtinas i lañget yan i tanò yan i mansi-

nahguan giya sina, si Jesus ni i sumisiha yan i Nanaña yan si San Jose. Hapanag-ñaihon siha guato ya hanae oro i Dikiki na Rai, insienso i Mâgas na Yuus, yan mirra ni i upinalaiñaihon si Yuus Taotao sa ti admam uchuot mahatot na finatai yan umahafot gi naftan.

Guaho lokue hudalalake i mauleg na finâtinasiñiha; ya huatue si Jesus ni korañonho yan i gineflieho, fina-oro ni i gaige giya guaho. Huchudae gue ni tinayuyotto, fina-paopao na insienso ni i mamagap giya halolom i antiho. Ya hunagigihen umatue gue ni manmauleg na chechòho siha, guaeyayonña ke i mirra; sa i chechò i mañgilisyano haiige i minauleg i tinegchà yan i minagap i tronkonhayo siha.

Lao i Saenata as Jesukristo guaha sa-sahñge minalagoña giya hita. I minalagoña na utageflamen yan utagoflie magahehet i tiguañta ya utachoguiye ya utanafañgemagof i mangaipinite sa gui-

ya-ha as Yuus machoguiguiye an-ha mageflamen i peble ni taya guinahaña yan i manai-mañaena yan i manmalañgo. Anae gagaige-ha gi tanò i Saenata as Jesukristo hasañgan: “Infâtinase i mandikiki na mañeluho, ya guaho-ha na maisa infâtinase.” Enao mina, boi-humaasie yan hukefamauleg i mamoble taemano i kadada pat anako na ninasiñan i kanaiho yan i guinahaho siha.

MINA SINKO NA HAANE.

—————«»————

Mafatan Jesus gi gumayuus Jerusalem.

Kalan unlilie si San Jose yan si Santa Maria na kokokolo guato gi gumayuus Jerusalem gi mina kuarenta na haane ginen i mafañagon i Patgon as Jesus. Mansugo guato. Ya si Santa Maria yan si San Jose hanahinegue as Simeon i Dikiki na Patgon; ya i Profeta haofrese si Yuus Tata nu i mamaisa-ha na Lahiña, sa hageftuñgo na i hinaguegueña na Petgon ti iyon i taotao na iyon Yuus-ha na gaige gi lañget. I Patgon as Jesus, achog-ha mamamatkilo-ha hanaeñaihon lokue i haaniña as Tataña, tulaika yan fina-pas i maisagueña, sa hatatañgan na i famaguon Adan yan Eba ufanmalag i lañget. Si Yuus Tata gi sen malag na Fanmatachuñgan gi lañget ninamagof ya hachahlao magof i ninaen Jesukristo ni Lahiña yan i Nanan i Patgon as Santa Maria. Hachachahlao nai, achog-ha ha-

pôloñaihon talo gi trenta i tres na sakan
gi kanai i Nanaña.

Finagpoña, i Patgon as Jesus maapasiye dos paluma taeguihe i tinagò Moises nu i taotao siha ni i mamoble yan taya megai iyonñiha.

Guaho lokue matagò yo na hunae si Yuus ni guinahaho siha sa iyoña siha. Magode yo lokue na hufâsaenaho si Yuus, sa i kanaiña munahuyoñg yo gine i taya; ya enao hufâtinas seso, kololoña an ogaan gin kahuhulo yo gi asonho yan talo an pueñge gin kumekemaigo; ya hutalo gin dameñggo yan magas gupot anae hugopte gefkilisyano i Saenata, huosge i Santa Iglesia, ya huhanao magof humosme misa yan huchogue i chechota na mañgilisyano, ayo siha i manyoase na chechò ni i uhanahaso yo na iyón i Saenan i taotaoho yan i antiho yan i guinaha siha ni i hufânanaan na iyoko. Nana lao! Ya hafa taemano inesgeko naya nu enao i matagòho?

MINA SAIS NA HAANE.

«»

Finalago guato giya Egipto.

Kalan unlilie i rai as Erodes na mananagò na umapuno i Patgon as Jesus, sa hinahalañg i korasonña na uinamotguan nu i rainoña. Manmapuno ayo na haane i famaguon ni i dos años papa sakaniha giya Belen yan i man ácheton na soñgsoñg siha. I añghet Yuus hanatuñgo si San Jose na guaha kumekepuno si Jesus. Ya i santos na Patriatka ayo ha na pueñge hakone i Patgon yan i Nanaña yan mammalago guanto giya Egipto na tanò. Siete años i mañaganñiha guihe. Lao anae matai i baba yan taglahiyon na rai, i añghet hatagò si San Jose na ufanalo guato Israel. Ya manmapos siha ya mañaga giya Nazaret.

Taeguenao finâtinanasña i Saenata as Yuus nu i ante siha ni i man inayegña. Yagin muto si Yuus, siña hapuno si Erodes pat hachoma na unalamen i yiniusan

na Patgon. Lao gaoña na i tailaye na rai ululog naya i baba na hinasoña; sa hakekefanague hit na utatuñgo na i mañantos gi tanò guaha nai ufanmasâpet yan ufanmanatailaye. Ya enao i magahet na chalan lañget, lu maiot, mitituka yan nápinite.

Guaho lokue hueyag na yagin hu kehago i rainon i lañget, yagin hu keke abog yan si Yuus, huhaso na ufansilog i chinatsaga yan i pinite gi fion i korasonho. Yagin manatailaye pat manapinete yo, hafa huchogue? Hudalalake i minesñgon yan i chumiloñg hinalom yan i ti aguyon na minatatñgan Santa Maria yan i asaguaña as San Jose; hufamatkilo-ha ya husetbe si Yuus mano-ha pineloloña nu guaho.

Ada taeguenao i minesñgonho naya anae masasâpet yan mapetsisige yo nu i taotao siha?

MINA SIETE NA HAANE.

I gima Nazaret.

Kalan unlilie-ha i Sagrada Familia gi halom i etego na gumà Nazaret anae manisiha si Jesus yan si Jose yan si Maria. Si Jesukristo humalom gi mina ocho años i sakanya. Acha-gatbo yan i lañget, yoase umadiñganña, mames mamatanña gi halom taotao, yiniusan na minames. Lumalamodoñg gi grasia yan i tiniñgo. Ogaan yan pueñge mananaitai kalan Yuus-Tao- tao, dumidimo gi mènan i Tataña, ya i Tataña tinitina lokue anae kumekechocho yan an magpo chumocco. Guaha teñga nai hatatane gue i chechò sumisiha yan si San Jose. Guaha nai teñga hachoguiguiye i nanaña ya hafamamauleg i gimà; teñga nai humuhuyoñg ya máñisiha yan i famaguon taotao manátatnon gi chalan, ya i mangachoñgña manninginanman nu i minauleg yan i minames ni

i mamagap gi pachotña yan i kinalamtenña. Siete años inabmamña i Sagrado na Familia giya Egipto na tanò, ya ti sañganon i minagof Santa Maria yan i asaguaña as San Jose anae mansineda gi la-gefsaga na gumàñiha giya Nazaret. Lao mato lokue gi hinasonñiha na i haguaya na Patgon Yuus ti abmam umasâpet yan umapuno gi kiluus.

I mamagap guenao na i Saenata as Yuus hanamamagof gue nu i taotao siha yagin aanog i tinai-ninasiñaniha. Hanafan átahgue i pinite yan i minagof siha gi halom gumà. Gaitiniñgo yo nu enao; ya muñga ho munatagkilo yo yagin hufagchae i ginefsaga ni i haflag yan fapostol ya hutuñgo i finafaposña. Muñga ho lokue tumaihinalom yagin-ha hinegse yo nu i chinatsaga taeguihe mohon i sinalà yan yinite yo as Yuus. Lao hutuna i Saenata gi ginefsaga yan i chinatsaga sa acha-pinelon Yuus, achaninaiña nu guaho, ya siha uhanahago yo ni lañget;

ya enao-ha ginagagaoña giya guaho tulai-kan-i manoftof na finamaulegña nu i antiho. Ti hunamalofan i haane na ti hutuna yan hunatagkilo i santos na. Na-anña.

Lao haftaemano finatinasso naya gi hinatsaga yan i ginefsaga siha?



MINA OCHO NA HAANE.

«»

Si Jesukristo gi gumayuus Jerusalem.

Kalan unlilie guine-ha gi mēnamo i námaagodai na Patgon as Jesus na sumisiha yan i Nanaña yan si San Jose. Man inesgagaihon nu megai na mañataotañoiha manhahanao guato giya Jerusalem. Mangigo i tres mansugo guihe. magpo i tinayuyut yan i chechoñoiha gisanhalom i magas na gumayuus, manmahñao yan manhahanao talo gi tanoñoiha. Si Santa Maria umetnon yan i famalaoan; ya San Jose hadalalag i lalahe. Pago, i famaguon siña-ha haosgaihon i tata pat i nana. Anae tumalo umásoda si Maria yan si Jose, halie na taigue si Jesus giya siha. Kulan inachan makat na matiyo ayo na piniten i Korasonñoiha. Mamaisen nu i palo siha na mangachoñg kao guaha nai linie si Jesus; lao taya lumie i yiniusan na Patgon.

Huhahaso yan hunamañgto guine i mahatot sumen malaet na piniten Maria.

yan Jose. Man osgon nu i pintó Yuus; lao kalan machaflileg i korasonñiha, sa ti sañganon i minakat i pinitenñiha guihe. Tumalo guato Jerusalem, halayague i ti man tufuñgon yan man áfutut na chalan i siudad Yuus.

Hafa na hanadiniñgo gue nu i Nanaña yan si San Jose? — I malagoña na ufanague yo na guaha lokue pintoña na hutane yo gi chechò i Tataña na gaige gi lañget. Yagin malago i Saenata as Yuus na hunafona chumogue i tinagoña nu guaho ke i tinagò taotao siha, ayoha hunafona. Yagin i korasonho kinekehulat nu i pinite yan i tinañges i mañaenaho pat i manáchihetto, uhaso i finapos i Niño Jesus yan i mañaenaña ni i minaeeyag yo na mona si Yuus ke i taotao. Si Maria yan si Jose finaliñgaiguan nu i Patgon as Jesus, lao ti hinasñgune, ti isaoñiha yenao. Si Yuus-ha gumuai-pintò, guiya chumachage i minesñgonñiha, sa dañgkulo i gineflieña nu siha. Anae chuma-

chalan siha tres na haane gi sanhalom iya Jerusalem, manmapos-ha hadalalake guato i mágas gumayuuus, anae hasoda i Patgon Yuus ni i matatachoñg guihe man áasa-ñgane yan i manhulon yan i manmágas na mamalè, man áfaisen yan man áope nu i manlinañgitan siha.

Ya guaho, ada ti hunafaliñgo si Yuus, ya teñga huhasñgne? — Huo nai. Hunainale yo ya huisague si Yuus makakat. Hunaabag si Jesus; hafaliñgaiguan yo si Yuus. Hokog maliñguho! I na binabà; i na tinailayeko! Ya pago na haane ada ti huatotga tumalo umaligao ya hunafáñotsot i korasonho yan hunameton i hinasoko ya ti uletke talo si Yuus? Ada ti hugagao i yiniusan na Korason na ugai-pinite nu guaho?

Huñggan. Boi-hugeffonfesat i isaoho siha, ya husetbe si Yuus ni Saenaho yan Tataho; ya ti huabag talo giya guiya gi tetehnan i haaniho.

MINA NUEBE NA HAANE.

—————«»————

I gef manosgen Jesus.

Kalan unlilie guine-ha gi mēnamo i Patgon as Jesus anae badiñgo i gumayuus Jerusalem ya tumalo guato Nazaret manisiha yan si Santa Maria yan si San Jose. Sumaga giya Nazaret trenta años, manneesge-ha. I Patgon as Jesus anae hadiñgo tres na haane i mañaenaña gi gumayuus, hafananague hit nu utaosge guse i sasahñge na pintò Yuus giya hita, ya utapôloñaihon i guinaeyan i tataotaota yagin enao ti umaaya yan i tagkilo na pintoña.

Lao anae tumalo guato Nazaret, taya manmasañganenmame, nà guiya man oosge-ha as Maria yan Jose. I malagoña guine muna eyag hit na sen tunayon i manosge nu i mañaena yan i manmâgas ni i mangaipekà, sa si Yuus-ha maosgiye giya siha, ya siha hahuyuyuñge i Saenata guine gi tanò. I humohoñgge

i taotao ni i gumehilalue, si Yuus Tata ni i gaige gi lañget hahohoñgge. Pago, i aguaguat, i chatmanosge nu i tatagò na mágas, si Yuus na todo-ha hanasiña chinatoosge yan sinaguaguate. Magahet na i mañaena yan ayo siha i mangogohe mantinagò as Yuus na chañihá munahu-huyoñg tinagò siha ni i manachaot yan i tinago Yuus yan i tinagò i Santa Iglesia.

Chatmatago, aguaguat i taotao; ti yaña manosge; ti yaña magehilue. Lao yagin hulie i Lahen Yuus na mamapatgon ya manoosge-ha trénta na sakan nu i nanaña yan si San Jose (lu ti sentataña); haftaemano yan i manátago?

* * *

FANMATO, manheñge, fata i minagof; fanmato giya Belen. Atan i Patgon, Raï añghet siha. Tañgiñgi, taadora si Jesus...

Ilegña i añghet nu i pastot siha: estague i Kristo giya Belen, gi sagan gaga, chatsaga, taimima.

I malag na INA, Lahen Yuus Tata, humuyoñg sen Taotao, achaiguata. O yiniusan Dikiki na Patgon.

Malañgo i taotao, ti amtiyon esta; lao mato si Yuus ni Yóamte. Guiya i amot náhoñlo yan mames.

* * *

PUEÑGEN YUUS, pueñgen Jesus — umatuna si Yuus! — Ya ufato gi taotao siha — i hatañga na pasñiha — gigigo-ha yan si Jesus. Pueñgen Yuus, pueñgen Jesus. — Dalai lokue sen manpos — aanog i Rai i rai siha — guihe gi eschoñgñañiha — ya ti yanñiha si Yuus. Pueñgen Yuus, pueñgen Jesus. — Masañago si Jesus — lao tat gaege gi eschoñgñaña — na si Jose-ha yan Si Napaña — manpos pineblen Yuus.

Pueñgen Yuus, pueñgen Jesus. — I añghet Yuus Mapos — hasañgane i pastot siha — na mañañago i Raiñiha — Kristo Mesías yan Yuus.

* * *